

FORUM ONG TIMOR LESTE THE EAST TIMOR NGO FORUM



Caicoli Street, Dili-East Timor phone 7394011/ 7265169 nicorede@yahoo.com

DEKLARASAUN HAMUTUK

LIAN SOSIEDADE SIVIL-NIAN KONTRA INTERVENSAUN GOVERNO NO PRESIDENTE DA REPUBLIKA-NIAN BA SISTEMA JUDISIARIU

14 Setembro 2009 (Rev. 16 Set.)

Introdusaun

Iha loron 30 fulan Agostu 2009 Premeiru Ministro, Kairala Xanana Gusmão fo libre ba Eis Milisia Laksanakan Sapu Rata (LAKSAUR), Maternus Bere husi Prisaun Becora. Maternus Bere mak eis comandante milisia Laksaur ida ne'ebé iha loron 6 Setembro 1999 involve direta iha Massakre Igreja Suai hodi oho-mate populasaun barak inklui Padre nain tolu. Iha tinan 2003 Panel Special Crime Grave ONU-nian hasai akuzasaun kontra Maternus Bere ho nia maluk lubun ida (Numeru casu 09/CG/TDD/2003).

Iha loron 30 fulan Agosto 2009, Ministro dos Negocios Estranjeiro Indonesia-nian, Hasan Wirahuda hetan konvite espesial atu mai atende Celebrasaun 30 Agosto 2009. Tuir informasaun ne'ebé ami halibur, Hasan Wirahuda halo presaan ba Governo katak bainhira Governo la fo libre imediatamente ba Maternus Bere, mak Hasan Wirahuda lakohi atende Celebrasaun 30 Agosto ne'e. Hatutan ba presaan politika ne'e, Presidente da Republika husu ba Premeiru Ministro atu lalais kedas fo libre ba Maternus Bere.

Premeiru Ministru tuir mai husu Ministra da Justisa ba hasai Maternus Bere husi Prisaun Becora no entrega kedas ba Ambassador Indonesia-nian iha Timor-Leste. Fo libre ba Maternus Bere la liu husi desizaun tribunal.

Iha loron 6 Setembro aktivista direitus umanus lubun ida hamutuk ho familia vitima Masakre Suai-nian ba sunu lilin hanesan meius protestu pasifika ida iha Konsuladu Indonesia nia oin.

Parlamentu Nasional iha loron 8 Setembro vota ba resolusaun kona-ba viasen husi Presidente da Republika-nian ba rai liur. Maioria Parlamentu vota kontra viasen Presidente da Republika-nian. Iha loron 10 Setembro Presidente da Republika ameasa atu resigna an, no Parlamentu Nasional aprova pedidu ba viasen Presidente da Republika ba Estados Unidos, Dinamarca no Alemanha.

Forum ONG no nia membrus sira identifika problema instituisaun lubun ida ne'ebé bele prejudika ispiritu Konstituisaun kona-ba prinsipiu separasaun de poder, justisa no ameasa ba soberania de Estadu.

Deklarasaun hamutuk:

1. Forum-ONG no nia membru sira lamenta tebestebes ho atitude politika Governon nian ne'ebe halo intervensaun direta ba independensia judisiariu liu husi fo libre ba eis milisia Maternus Bere la liu husi desizaun tribunal. Husu ba orgaun estadu-nian tomak atu respeitu prinsipiu separasaun de poder entre orgaun estadu idaidak.
2. Forum-ONG no nia membru sira triste ho frakeza iha instituisaun Estadu-nian sira, liuliu Presidente Republika no Governo ne'ebe sei nafatin hakruuk ba intervensaun internasional, liuliu husi Indonesia hodi fo libre ba autor krime grave sira. Husu ba Governo, Presidente, Tribunal no Parlamentu Nasional atu konsolida komitmentu atu promove justisa iha Timor-Leste.
3. Forum-ONG no nia membru sira kondena asaun intervensaun politika husi Republika Indonesia-nian ba soberania judisiariu Timor-Leste nian. Husu ba komidade internasional atu kontinua fo presaan ba Republika Indonesia liu husi dalan oinoin atu hamoe Indonesia no Timor-Leste iha asuntu justisa ba vitima violasaun direitus umanus iha Indonesia no iha Timor-Leste.
4. Husu ba Presidente da Republika atu promove prinsipiu separasaun de poder, hamenus intervensaun ba orgaun judisiariu-nian, no husu atu Presidente kumpri nia juramentu hanesan estabesele iha Artigu 77 Konstituisaun RDTL.
5. Husu ba tribunal atu hasai karta kapturasaun ba Maternus Bere basea ba nota akuzasaun husi Tribunal Distritu Dili, Painel Special ba Crime Grave (no. 09/CG/TDD/2003).
6. Husu ba orgaun estadu idaidak atu komprende knaar orgaun estadu idaidak-nian no labele halo intervensaun ba independensia husi kada orgaun estadu, liuliu labele halo intervensaun ba tribunal nia servisu.
7. Husu ba instituisaun estadu hotu atu valoriza ejjensia vitima masakre Suai-nian kona-ba justisa ba Maternus Bere, liuliu kona-ba fatin hakoi subar vitima Masakre Suai-nian.
8. Fo honra ba Governo Timor-Leste tanba hadiak tiha ona rate heroi (Taman Makam Pahlawan) Indonesia nian iha Timor-Leste iha Liquica no Dili. Husu atu Republika Indonesia halo kna'ar hanesan ba vitima iha Timor-Leste, liuliu husu Governo Indonesia atu hatudu materuin sira ne'ebe to'o ohin lora seidak deskobre.
9. Basea ba Artigu 160 Konstituisaun RDTL katak Crime Grave husi 1974 to'o 1999, tenke prosesa liu husi Tribunal no Internasional, laos liu husi desizaun politika baratu. Husu atu Estadu respeitu prinsipiu Konstituisaun Artigu 160 ne'e. Hatutan ba ida ne'e, ejji Parlamentu Nasional no orgaun Estadu tomak atu lalais kedas debate Relatorio CAVR Chega no implementa nia Recomendasaun hotu.

Representante Organizasaun Sociedade Sivil: